



**PRIJEDLOG**

Broj: 01/1-02-201/14  
Ilijaš, 05. 02. 2014. godine

**Z A P I S N I K**

sa TEMATSKE sjednice Općinskog vijeća Ilijaš održane dana 04. 02. 2014. godine,  
sa početkom u 10:00h.

Tematskom sjednicom OV-a Ilijaš je predsjedavao zamjenik predsjedavajućeg OV-a  
g-din Mahir Dević.

<b>RB.</b>	<b>IME I PREZIME</b>
<b>SDA</b>	
1	MAHIR DEVIĆ
2	NEDIM MATORUGA
3	SAUDIN DURMIĆ
4	HALID DIZDAREVIĆ
5	AMAR DOVADŽIJA
6	MUAMER DERVIŠEVIĆ
7	FAHIR HASANOVIĆ
8	RASIM ŠEHIĆ
9	SELMA PUŠINA
<b>SDP</b>	
10	ALAN ŠERAK
11	MARIONETA ILIĆ-JURETA
12	-
13	SELVER HERIĆ
<b>SBB</b>	
14	ADEM EFENDIĆ
15	NIJAZ MAŠIĆ
16	SEAD ŠEHIĆ
17	AKIF BEŠLIJA
<b>SAMOSTALNI VIJEĆNICI</b>	
18	EDHEM HASANOVIĆ
19	ASIM MUJIĆ
<b>STRANKA ZA SREDNJE</b>	
20	BESIM GLJIVA
21	-
<b>LDS</b>	
22	NIJAZ RASTODER
23	NIHAD BUČUK

	<b>BPS</b>
24	MUHAMED HANDŽIĆ
	<b>SDU</b>
25	DIZDAREVIĆ ENES

Odsutni vijećnici:

1. Damir Filipović
2. Aida Mališević

Prisutni gosti:

1. Semir Spahić - Radio Ilijaš
2. Idriz Efendić – načelnik 5.PU
3. Miralem Muslić – predstavnik MUP-a Kantona Sarajevo
4. Safet Šabović – načelnik odjeljenja krim policije Novi Grad
5. Alaudin Alihodžić – tehnički direktor Elektrodistribucije Sarajevo
6. Almira Ćosić – volonter
7. Nermina Smajić - volonter

Ostali prisutni:

1. Akif Fazlić – općinski načelnik
2. Merima Osmanović – pomoćnik načelnika
3. Mersa Zeković – stručni saradnik za poslove prostornog planiranja i urbanizam
4. Adha Masnopita – stručni saradnik u Službi za društvene djelatnosti
5. Maida Habibović – zapisničar.

Zamjenik predsjedavajućeg je otvorio sjednicu i konstatovao da postoji kvorum za odlučivanje.

Zatim je dao na glasanje predloženi dnevni red.

OV-e nije imalo primjedbi, te je jednoglasno usvojen slijedeći

#### **DNEVNI RED**

1. "Problematika elektrosnadbijevanja na području općine Ilijaš".

##### **AD-1**

"Problematika elektrosnadbijevanja na području općine Ilijaš".

Akif Fazlić – ja također koristim priliku da vas sve poselamim i pozdravim i zaželim uspješan rad današnje sjednice. Problematika elektrosnadbijevanja je u posljednjem periodu bila na jednom nivou koji je doveo da općinsko vijeće u nekih zadnjih pola godine se bavi ovom problematikom, dakle, od oktobarske sjednice kada smo imali tačku dnevnog reda pa do zaključaka i evo na kraju zadnjeg zaključka sa sjednice od 31.12. gdje smo zaključili da se održi tematska sjednica. Ovaj problem zaista i zaslužuje ovu pažnju, te se želim zahvaliti općinskom vijeću da se uključilo na ovako aktivan način u rješavanju

ovog problema jer je on u prošloj godini zaista eskalirao do jednog nivoa gdje smo morali početi zauzimati i političke i svake druge stavove, da bi došli do rješenja koje će značiti kraj neke, uslovno rečeno, agonije kada je u pitanju elektroisnadbijevanje grada i prigrada općine Ilijaš. Ja danas očekujem da ovdje vodimo jednu konstruktivnu, objektivnu diskusiju koja će prije svega podcrtati realno stanje kakvo jeste trenutno kada je u pitanju elektroisnadbijevanje i očekujem da predložimo rješenja koje će dovesti da to stanje u narednom periodu bude riješeno, da bude na zadovoljavajući način. Moramo reći i par rečenica u smislu analize onoga šta se dešavalo. Kada govorimo o analizi, moramo izanalizirati odnos institucija koje su zadužene za pitanje elektroisnadbijevanja, a to je prije svega Elektrodistribucija, to su policijske strukture, te mi je zadovoljstvo što su danas predstavnici Elektrodistribucije i predstavnici policijske strukture prisutni na sjednici općinskog vijeća i naravno svi drugi faktori koji su mogli uticati da problem ne bude eskaliran na nivou kakav jeste i moramo dati ocjenu odnosa prema tom problemu. Nažalost, sve što je rađeno, iz svih struktura, nije dalo adekvatan odgovor da se riješi taj problem, tako da, nedavanje adekvatnog odgovora, ili rješenja ovog problema, građani su ostali taoci takvog jednog stanja i koji su na kraju podnijeli sav teret nefunkcioniranja, odnosno, ne nalaženje rješenja ovog problema. Svi znamo koliko je prekida bilo u napajanju, koje su posljedice, ali moramo još jedanput podcrtati da oko 15.000 stanovnika, zatim institucija nisu imale struju u tom periodu, od Doma zdravlja, škola, privrede, građana i svih tih negativnih efekata u periodu trajanja nestanka električne energije. Na takvo jedno stanje, evo i vijeće je počelo davati taj odgovor, u smislu traženja od svih relevantnih institucija da to počnemo rješavati, i na neki način zadužila mene i sve nas i u mjesecu januaru je bilo zaista intenzivnih aktivnosti, od sastanaka na nivou izvršnog direktora Elektroprivrede za distribuciju do sastanaka sa Federalnim Ministarstvom za energetiku, rudarstvo i industriju, također od ovih kontakata direktnih sa Elektrodistribucijom, sa načelnikom policijske uprave, i mislim da kroz ovaj materijal koji ste dobili date su određene naznake kako ići i u kojem smjeru ka rješavanju ovog problema. Međutim, ono što dodatno opterećuje ovu stvar koju jesmo imali, a ona se direktno vidi iz rečenice koju je sama Elektrodistribucija napisala u ovom aktu gdje se kaže da nema rezervnog napajanja za Ilijaš, da smo u takvom trenutnom stanju i da nema struje za nove konzumente, posebno u industrijskoj zoni. I te dvije rečenice su zaista ključ problema i treba da bude okosnica naše današnje diskusije i onoga što trebamo da predložimo u smislu rješavanja problema. Dakle, da ne govorimo samo o posljedicama kakve imamo, do onoga što je narušavanje imidža općine Ilijaš, što je u ovakvim uslovima nezaposlenosti, neke borbe za potencijalne investitore, ovaj podatak da nemate dovoljne količine dodatne struje je frustrirajući, moramo se objektivno, ali i oštro postaviti prema tom problemu i zaista ubrzano ići i tražiti ta rješenja. Ta rješenja su tehnički sigurno jasna, međutim moramo vidjeti i kako su provodiva, prije svega terminski, a onda kako će ih institucije same provesti. Ključni problem jeste, nefunkcioniranje ove javne korporacije elektroprenos, neizgradnje nove trafostanice 110 u željezari Ilijaš, apsurdno je reći da u Ilijaš dolaze dva visokonaponska dalekovoda iz pravca Kaknja i Jablanice, a da u gradu nemamo struje. Taj problem je Federalno Ministarstvo prihvatilo kao nešto što treba da bude prioritet novim investicionim projektima elektroprenosa i ministarstvo i federalni ministar energetike su poslali prema elektroprenosu takav svoj stav i naravno očekujemo da Elektroprivreda kao neko ko se naslanja na elektroprenos takav stav izrazi prema elektroprenosu i da barem znamo da je ta trafostanica u prioritetima tih investicionih programa javne korporacije. Drugi problem jeste problem dalekovoda Blažuj-Stari Ilijaš koji očito institucije nisu mogle sačuvati. Ja kada sam rekao u jednoj izjavi da građani općine Ilijaš neće tražiti struju pred policijskom upravom, želio sam da kažem da građani ne smiju biti taoci svega onoga što sistem treba da riješi, a nije riješio. Prema tome, ne želimo mi

da aboliramo nikoga u odgovornosti koje imamo prema jednom problemu koji prevazilazi kvalifikaciju teška krađa kako je dato u izvještaju policijske uprave, ta kvalifikacija je sigurno mnogo teža, i očekujemo zaista od policijskih struktura da se zaštiti ovaj dalekovod. Ono što me raduje jeste da je Elektrodistribucija počela praktično projektovanje, da li zamjene ukupnog dalekovoda ili samo vodiča, ali su pokrenuta neka tehnička rješenja koja treba da zadrže ovaj dalekovod u funkciji. Očekujemo da kroz snadbijevanje u narednom periodu, dok se sve to ne realizuje, sva ova dešavanja, da nema struje po 8 do 10 sati, ne smiju desiti u općini Ilijaš, poslije svih tih dešavanja koja su značila i strpljenje građana i sve ono što oni jesu podnijeli, i na jedan određen način očekujem od svih onih koji su odgovorni, dok se ne dođe do ovih krajnjih rješenja, da se tako postavimo prema ovom problemu, da evo kao što imamo danas, struje ima, a dobili smo informaciju da je dalekovod i prošle noći napadnut. Ja pozivam vijeće da u jednoj objektivnoj priči, da dođemo do zaključaka kada možemo reći da nemamo više problema u elektrosnadbijevanju općine Ilijaš. Toliko, hvala.

Idriz Efendić – načelnik 5.Policijske uprave - koristim priliku da se odmah na početku obratim onim policijskim riječnikom i da kažem da krađa na području Ilijaša traje već dvije godine, zato smo mu dali kvalifikaciju da je vrlo složen proces, koji obuhvata nekoliko općina i dobiva obilježje međuentitetskog, međukantonalnog i međuopćinskog kriminala. Evidentno je da prodaja ukradene robe završava na drugim kantonima, a možda i na entitetima i drugim upravama, odnosno u općinama, i utoliko više usložnjava policijsku istragu koja je usmjerena u tom pravcu. Konkretno, za pet mjeseci, od 1. septembra do 4. februara na području općine Ilijaš, u Donjoj Bioči, vodile su se dvije krađe kablova. U 2013. godini, dogodilo se 25 presijecanja kablova, od čega 13 u Novom Gradu, 9 u općini Ilijaš i 3 na općini Ilidža. Svako presijecanja i krađa kablova rezultira i ima za posljedicu nestanak električne energije na području gdje mi živimo i radimo. Našim zapažanjima smo uočili da se radi o počinocima koji su jako dobro organizovane grupe, koji koriste noćne sate i koji pod okriljem noći vrše krađu materijala, koriste veliko područje, gustu našumljenost i rastinje, najvjerovatnije kada ukradu robu usitnjavaju je i nose pješke kroz šumu na određene destinacije gdje je naknadno preuzimaju i dalje distribuiraju. Svjesni značaja posljedice ovog krivičnog djela, mi u policiji smo preduzimali slijedeće mjere: pojačali smo fizičko prisustvo osjetljivim područjima, informativno razgovarali sa najmanje deset lica, koji se mogu dovesti u vezu da su izvršili ovo krivično djelo, poligrafski ispitivali 6 ljudi iz Ilijaša, sarađivali sa drugim policijskim upravama, održali sastanak mjesnog savjeta u Donjoj Bioči, kojem se odazvalo preko 40 ljudi, izvršili smo nekoliko pretresa otpada, uključujući i pregled i pretres nekoliko otpada u RS-u, Kantonu Sarajevo i dalje, nažalost, nema rješenja i nema rezultata. Evidentno je da smo u proteklom periodu, imali dosta informacija za druga krivična djela kada su u pitanju građani, ali začuđuje da u ovom misterioznom kontekstu problema nemamo ama baš ni jedne informacije, kako Ilidža, kako Novi Grad, pa tako i uključujući i Ilijaš. Područje koji policajci osiguravaju, evo zadnjih mjesec dana, mi smo tamo u klasičnoj zasjedi, pitanje je koliko dugo vremena sa ovoliko ljudskih resursa i kapaciteta, mi možemo izdržati, svaki dan se neko razboli, odlazi na bolovanje te drugi razlozi, nismo mi tako brojna jedinica koja može na tako dugom prostoru, a ponekad imamo i vremenske uslove koji nam otežavaju kao što je bila gusta magla, te su nas u tom periodu lopovi potkrali. Da istaknem još jednu otežavajuću okolnost u ovoj problematici, a to je kada se dogodi presijecanje kablova, mi najmanje sat ili sat i pol u policiji nemamo informacije koja je to lokacija, možemo nagađati i pretpostavljati, određivati se i blokirati putne pravce, koja koriste motorna vozila, ukoliko se krađa vrši sa motornim vozilom, i blokirati staze, pješačke puteve, lokalne, kojih ima hiljade tamo koji povezuju Dobroševiče, Ahatoviće, i ostala mjesta. Znamo mi u policiji svoje obaveze,

osnovna funkcija je primarna zaštita lične imovinske sigurnosti, ali isto tako znamo, a trebaju i svi građani da znaju, da vlasnik imovine ima obavezu da štiti svoju imovinu. Ja dajem prijedlog, privrednom subjektu Elektroprivreda, da i sam preduzme mjere samozaštite, kao nadležni i istražni organ za isporuku električne energije u područje Ilijaš. Te mjere odnosno, prijedlozi su slijedeći, da li na fizički ili na bilo koji drugi način, da se uđe u prostor sa zaštitarima, danju ili noću i da se obilaze osjetljiva područja, da li da se eventualno ugrade tehnički uređaji koji će na ugroženim područjima pratiti šta se tamo događa. Iznalaženje interesantnog bakrenog kabla, zamjena tog vodovodnog kabla za napajanje električne energije nekim drugim aluminijskim kablom, te zadnji prijedlog iznalaženje alternativne dostave prenosa električne energije u područje Ilijaš. Mi ćemo u policiji nastaviti kontinuirano i pojačano naše aktivnosti, ali insistiraćemo na udruživanju snaga, i tražićemo pomoć od privrednih subjekata i građana da nam pomognu, jer sami sigurno ne možemo, a i ako možemo onda ćemo sigurno kasniti, izgubiće građani, a i mi sami strpljenje, jer je evidentno da raste nestrpljenje i nepovjerenje građana, u pogledu svih ovih događanja. Znamo da nerješavanje ovog problema, ostavlja prostora za nepovjerenje i straha od ponovnog događanja. Mi u policiji smo svi isfrustrirani kada će nam se to ponovo dogoditi i ljudi traže ujutro muštuluk kad smo spasili te noći područje i kablo, da imamo struju, da neće trpiti ni domaćinstva, ni Dom zdravlja, ni općina, ni druge strukture, privredne, društvene, političke i druge. Kada se uključe drugi subjekti, kada budemo zajednički djelovali, bićemo operativniji, funkcionalniji, organizovaniji, te sam uvjeren da ćemo ostvariti krajnji cilj koji se zove hvatanje lopova, procesuiranje, kompletiranje, dokumentovanje i predaja nadležnom tužilaštvu, a oko kvalifikacija znamo da se ovo tretira kao teška krađa, a kada se dođe u završnu fazu može se govoriti o preinačenju tog krivičnog dijela, da se to tretira kao oštećenje tih primarnih objekata, gdje je zapriječena kazna od 1 do 10 godina zatvora.

Alaudin Alihodžić – tehnički direktor Elektrodistribucije Sarajevo - uvaženi vijećnici, predsjedavajući vijeća, načelnice i ostali gosti, ja bih da vam se zahvalim na pozivu, i da vam se u svoje ime i u ime svog kolektiva zahvalim na pozivu. Zaista sam ugodno iznenađen i zahvalan, što je organizovana tematska sjednica Općinskog vijeća Općine Ilijaš, obzirom da svi znamo o čemu se ovdje radi. Ovaj problem, neću reći da je eskalirao sada, on je eskalirao odavno, tri godine, i u tom periodu krenula su otuđenja sa ovih elektroenergetskih objekata, prvo u nekom manjem obimu, i radilo se na utvrđenjima na nekim manjim nivoima, na nekoj sistemskoj opremi, za dojavljivanje, upravljanje radio veze. Interesantno je navesti, što se tiče cijelog prostora Kantona Sarajevo, gdje ima nadležnost Elektrodistribucija Sarajevo, uključujući i Bosansko-podrinjski Kanton, najviše otuđenja se desilo baš na području općine Ilijaš. Govorim o početnoj fazi te eskalacije, tog problema, konkretno tog dalekovoda. U protekle tri godine, kao predmet interesovanja je konkretno ovaj dalekovod 35 kilovoltni, koji napaja kompletnu općinu Ilijaš, i dobar dio poslovne zone Rajlovac. Što se tiče ingerencije Elektrodistribucije Sarajevo, mogu odgovorno tvrditi da su poduzete sve mjere što se tiče onoga što su u opisu naših poslova i zadataka i ovlaštenja koja imamo, poseban je aspekt dat na ovaj vod, iako ovakvih vodova imamo na kilometre, i poseban tretman ima ovaj vod, obzirom da znamo u kakvoj se situaciji nalazi sama općina Ilijaš. U energetsom smislu stvarno se nalazi u nepovoljnom položaju. U kontekstu distribucije Sarajevo, radimo najbolje ono što možemo uraditi u tom dijelu, međutim imamo i dijelova koji nisu u našoj ingerenciji, to je konkretno primarno napajanje. Nažalost, u zadnjih sedam godina kompanija Elektrodistribucija je sama radila, odnosno nije radila svoj posao, ne samo ovdje u Ilijašu nego u cijeloj državi, i Ilijaš je jedan od tačaka na koji se odrazio taj njihov ne rad. Dosada je još trebala biti izgrađena trafostanica, u krugu željezare Ilijaš, još prije sedam godina zemljište je

otkupljeno i pripremljeno za realizaciju tog projekta, otkupljeni su i napojni vodovi koji su u vlasništvu željezare Ilijaš, lično sam ja učestvovao u tim pregovorima, tako da je cijela priprema napravljena, međutim, ta kompanija koja se trenutno nalazi na državnom nivou, današnja uprava nije našla za shodno da apsolutno išta radi osim da održava pogon u toj krajnje rizičnoj rezervi. Koliko imam informacije, to bi se stanje brzo trebalo promijeniti, trebali bi početi raditi u punom kapacitetu. Dužnost Elektrodistribucije, Federalnog Ministarstva energetike, industrije i rudarstva jeste da ćemo izvršiti pritisak na kompaniju Elektroprijenos, i već smo obavili neke preliminarne razgovore, da se ovaj objekat trafostanice 110 u Ilijašu stavi u visoki prioritet, znači, čim dođe do deblokade rada kompanije, da se krene u realizaciju tog projekta. To je sa aspekta i kvaliteta i sigurnosti napajanja općine Ilijaš. Što se tiče distribucije Sarajevo, tu smo stvarno uložili velike napore, konkretno za ovo područje, te se ovim putem zahvaljujem i građanima Ilijaša na velikoj pomoći prilikom realizacije ovih naših projekata, kojih smo imali stvarno puno i imaćemo ih još uvijek. Što se tiče samog ovog 35 kV-og dalekovoda, dok se ne riješi problem sa prenosom, mi ćemo iznaći još dodatne napore, napravili smo reprogram sredstava, i radiće se na nekoj rekonstrukciji tog dalekovoda. Nažalost, ovo što se sad dešava, ne tretiram velikom krađom, niti krađom bilo kojeg tipa, mislim da je ovo sad već posrijedi nešto što se može nazvati terorističkim činom ili nekim drugim težim kvalifikacijama, jer nije ovo samo ukradeno metar ili 100 nekog kabla, pa odnešeno, ovdje ipak, po osnovu toga trpi šira zajednica, trpe građani. Ne bih se baš složio sa nekim organizovanjima privatnih vojski koje će čuvati, to ipak nije naša nadležnost niti naš posao, ako smo došli u tu situaciju, onda je situacija krajnje očajna, ako ćemo organizovati neke privatne vojske. U tehničkom aspektu radimo sve ono što se može uraditi i mislim da smo i mi dovedeni do neke granice iscrpljenosti i što se tiče finansijskog i što se tiče ljudskog, odnosno tehničkog dijela. Ljudi se često dižu u dva ili tri sata poslije pola noći i rade pod određenim okolnostima, nekada ulaze u neku neizvjesnost posebno kada su se te krađe desile u nekim nepristupačnim mjestima, kao što su šume ili nepregledni dijelovi. Interesantno je navesti da je dobar dio krađa desio između kuća, jer taj dalekovod prolazi kroz naselje, pa se ipak desila krađa i na tim mjestima. Mnogi od nas su očevidci tog čina, i ništa ne poduzimamo, dovoljno bi bio jedan telefonski poziv, međutim niko to neće da radi. Mi u zadnje tri godine nismo dobili niti jednu dojavu, iz baze od krađa, dobili smo uglavnom samo kritiku i te stvari. Izgleda da smo se mi kao zajednica opredijelili da ništa ne poduzimamo i da nam problem neko drugi riješi. U procesu je priprema rekonstrukcije ovog dalekovoda, i nažalost, dalekovod je u tehnički ispravnom stanju, i do sada smo na osnovu ovih krađa, pretrpjeli direktnu materijalnu štetu u iznosu od 550 do 600 hiljada KM, te pare koje su oni ostvarili prodajom tog bakra nisu pod iznosom, ali mi ne možemo takav materijal naći na otpadu, nego ga kupujemo kao nov. Vrijednost radova je između 550 i 600 hiljada KM, te ćemo još dodatno uložiti sredstva kako bismo se povukli pred tim lopovima ili teroristima, kako bi im udovoljili, mi ćemo sigurno uložiti još par miliona maraka. Ja vam neću garantovati da će oni odustati od svoje nakane, jer imamo izvještaj sa drugih lokaliteta, te ćemo opet uložiti sredstva u neku neizvjesnost. Također, radiće se na realizaciji projekta, spajanja distributivne mreže iz pravca Vogošće-Pretisa, kako bi se u distributivnom smislu što bolje povezali sa Ilijašem, da bi oslobodili jedan dio kapaciteta ove postojeće trafostanice i kako bi omogućili priključenje ovih manjih industrijskih dijelova. Konačno rješenje za kvalitetno snadbijevanje Ilijaša je izgradnja ove trafostanice, i da će biti razumijevanja ove druge kompanije, da se krene u realizaciju. U tom smislu ću vas zamoliti kao vijećnike, odnosno, načelnika općine da nam pomognete jer smo je do sad imali.

Zatim je predložena pauza od pet minuta.

Miralem Muslić- predstavnik MUP-a Kantona Sarajevo - ja vas srdačno pozdravljam sve i hvala vam na ovom pozivu. Svi znamo da imamo jedan veoma bitan problem koji stvara dodatne poteškoće i vama i nama, ne bih se puno nadovezao na ono što je moj kolega načelnik Pete policijske uprave iznio ovdje za govornicom, podržao bih one stavove, međutim ne bih se složio sa tehničkim direktorom Elektrodistribucije. Čuo sam ovdje veoma tešku optužbu, da se radi o uvođenju zaštitarskih agencija, paravojnim sistemima zaštite, mislim da to nije tačno, to su dodatna sredstva, i to ne trebamo tako posmatrati. Zaštitarske agencije su agencije koje su propisane zakonom i upravo ta ista Elektroprivreda koristi te identične organe u osiguranju svojih objekata u urbanim, gradskim područjima. Mislim, da nije sporno da se ti isti organi koriste i na lokaciji gdje datiraju njihovi objekti i gdje imamo križana žarišta, odnosno imamo probleme. Moramo svi zajednički pristupiti tim problemima i ne trebamo bježati od sredstava. Zamislite kad bi se MUP-u KS ili policijskoj upravi Ilijaš ili Vogošća, obratilo toliko tih subjekata i kad bi svi tražili policijsku zaštitu, prvo to je veliki broj sredstava, veliki broj ljudstva, koje mi ne možemo objektivno ispoštovati, i u ovom segmentu moje lično mišljenje je da poslodavac mora preduzeti, odnosno, ozbiljnije pristupiti rješavanju problema. Ne znam sistem kako će oni funkcionisati, ali nama treba podrška i pomoć, znači, ako mi možemo izdvojiti postojeći broj ljudskih resursa, adekvatan broj ljudi da dnevno pokrивamo taj prostor, zašto onda da i poslodavac tih objekata ne bi mogao dati određen broj ljudstva, da učestvuje u tim obilascima tih kriznih područja, moje je mišljenje, dakle, da poslodavac prihvati veću odgovornost u rješavanju problema. Mi ćemo i dalje nastaviti sa našim aktivnostima i vjerujem da će naša služba u skorije vrijeme imati preliminarne rezultate određenog broja izvršilaca po pitanju ovih krivičnih djela. Hvala.

Safet Šabović- načelnik odjeljenja krim policije Novi Grad - Gospodine predsjedniče, dame i gospodo, ja vas pozdravljam, selamim i želim ako Bog da da riješimo ovaj problem. Ja bih malo spustio lopticu i više kompromisno govorio nego pričao šta i kako jer svi znamo koji imamo problem. Dopunio bih samo informaciju načelnika policijske uprave jednim važnim podatkom da je Treća policijska uprava, tri ovakva krivična djela već riješila, imamo izvršioca, tužili smo ga, i to smo zaokružili. Međutim, problem je u tome što mi imamo više grupa u tome. Trenutno mi iz Treće policijske uprave imamo jednu grupu koju upravo ovih dana privodimo kraju, znači to su istražne radnje o kojima ne mogu govoriti, i o podacima koji nisu još maksimalno korisni, ali ćemo uskoro i to zaokružiti. Ovdje je problem dublje prirode i ja neću spominjati kolegu iz Elektrodistribucije jer mi smo sa njima imali ne dobru nego vanrednu saradnju, ja neću govoriti o njegovim obavezama, i složio bih se sa kolegom Muslićem kada kaže da one obaveze koje ima Elektrodistribucija moraju uraditi. Ovdje je istina najbolnija, a to je da je lokalna zajednica zakazala, ne bježimo od odgovornosti policije, neću da prozivam nikoga, jer vi na ovom području ispaštate, vi ostajete bez električne energije. Mi smo u zadnjih 9 mjeseci obišli svaku kuću na području Treće policijske uprave na području grada, svakog domaćina zamolili, obavijestili, ostavili broj telefona, kazali da ćemo maksimalno čuvati njihov identitet, da niko neće znati da su oni javili gdje postoji problem. Ono što je govorio načelnik i kolega iz Elektrodistribucije, jeste da mi nismo dobili niti jedan poziv od građana, da nam pomognu, ali vi morate shvatiti da mi moramo dobiti tu pomoć jer je to područje tako veliko i široko, sa mnogo šumskih puteva na kojima se može proći sa motornim vozilima. Imamo problem da se tu najvjerovatnije radi o tako dobro uvezanim grupama ljudi koji su u saradnji sa preduzećima koja vrše otkup sekundarnih sirovina. Materijalne dokaze je vrlo teško naći u ovom slučaju, a to se jedino može kada se uhvati na mjestu izvršenja krivičnog djela ili kada dođemo do podatka da se u određenom preduzeću za otkup sekundarnih sirovina u trenutku kada mi

dođemo zateknemo takav materijal.

Meni kao čovjeku koji se bavi ovim poslom jako bolno i ružno djeluje da građani ostaju bez struje, plaćaju taj energent, a da smo mi, kao društvo u cjelini, zakazali. Htio bih da kompromisno porazgovaramo i zamolio bih vijećnike, medije da se obratimo građanima i da im kažemo da se radi o resursu koji je i njima vrlo bitan i da se i njima ovo može dogoditi. Danas je ovo u Ilijašu, sutra možda u Sarajevu, na Ilidži itd. Moramo se više i bolje organizovati.

Mahir Dević – U funkciji predsjedavajućeg ove sjednice ne mogu da vjerujem šta sam sve danas čuo ovdje. Ovo govorim kao obični građanin i zaista ne mogu da vjerujem da postoji ovakva vrsta odnosa, ovako bitnih i važnih ljudi spram ovakvog problema. Znači, konstatacije od onih koje kaže policija da nema rezultata nikako, preko konstatacija da se trebaju praviti neke fizičke zaštite objekata, preko konstatacija da trebamo vidjeti šta kažu građani, jer i oni bi trebali biti aktivniji, do jednog općeg opisivanja stanja, nakon tri godine je apsolutno nevjerovatno i neprihvatljivo za ovo Općinsko vijeće. Mi već drugi put, kao najveći organ općine raspravljamo o ovom problemu, a znate li vi gospodo šta znači 25 puta kada vam ugase struju po 8-10 sati. Zna li šta znači kada 25 puta nemate struje kada krenete na posao, pa nema struje u školama, općini, objektima itd. Znači, mi danas ovdje opisujemo stanje kao da se to desilo jednom, pa ćemo vidjeti šta drugi put. Ovo prebacivanje odgovornosti sa Elektro distribucije na policiju i obratno, nas apsolutno ne zanimaju ti odnosi, nas zanima da imamo struju. Ne mogu da vjerujem šta sam sve danas čuo, kakvih teorija i teza, a mi već 25 puta moramo, kao lokalna zajednica, odgovarati ljudima zašto nemamo struje koju uredno moramo platiti, jer ako je ne platimo biće isključena. Ko je ukrao kabal, ko treba odgovarati, to ovaj organ ne interesuje kao ni običnog građanina. Mi želimo da imamo struju, a vi riješite problem da imamo struju.

Saudin Durmić – Na jednoj od prethodnih sjednica OV-a imali smo prisutne predstavnike Elektro distribucije Sarajevo koji su nas prosto "isfolirali". Sada postavljam pitanje tehničkom direktoru Elektro distribucije, znamo da je sinoć otuđeno cca 200 m elektro kabla i zbog čega jutros imamo uredno snadbijevanje električnom energijom i kako sada možemo imati alternativno snadbijevanje električnom energijom. Pitat ću vas kao predstavnika firme koja se bavi o isporuci električne energije, da li mi, kao Općinsko vijeće, trebamo zatražiti učešće i viših organa kako bi riješili ovaj problem elektro snadbijevanja. Ako bude trebalo ja ću to inicirati i da se pozovu i inspektori i vjerovatno u vašoj firmi ima neki registar naloga i da vidimo ko je onemogućio, ko je naredio da u prethodnih 25 slučajeva da općina Ilijaš nema uredno snadbijevanje električnom energijom.

Ja ću predložiti zaključak da pozovemo nadležne da sve ispitaju, pa ćemo pozvati na odgovornost.

Muhamed Handžić – Danas smo se naslušali svega i onog što nismo očekivali ovdje. Danas sam čuo i teških kvalifikacija, posebno onu terorizam. Kolege koji su došli ovdje moraju znati šta to znači, a ja, kao predstavnik jedne lokalne zajednice, moram reći da je to zastrašivanje građanstva. Gospodo, slijedeći put kada izađete za govornicu, termin terorizam ćete morati potkrijepiti činjenicama. Ja sam predsjednik savjeta MZ Luka i Bioča i želim reći da sam čuo dosta neistina ovdje. Rekli ste da ima puno šumskih puteva koji vode, a vi to ne možete pokriti. Ja kažem da postoje samo dva puta kroz Bioču koji su prohodni za motorna vozila i koje možete pokriti. To su putevi od Ilijaša do Ahatovića. Dalje, svi šumski putevi su neprohodni i zapriječeni i jednom prilikom sam se žalio zbog lovaca, jer ne mogu doći do lovišta zbog zapriječenosti. Ako sumnjate u moju informaciju, mogu zajedno sa vašim operativcima izaći na teren da to sve provjerimo. Dalje, rekli ste za



lokalnu zajednicu da nemate saradnju. Ni to nije tačno. Naš načelnik policije je prošle sedmice imao skup u Bioči gdje se odazvalo 40-50 građana i te probleme smo pokušali da zajednički stavimo pod kontrolu. Ima i drugih faktora koji utiču na ovo sve, a to je što prisustvo policije traje devet mjeseci i u Bioči je uveden policijski sat nenajavljeno. Što ste to uradili i trebali ste meni kao predsjedniku savjeta mjesne zajednice i općinskom načelniku prijaviti. Građani se zaustavljaju i maltretiraju. I pored svih tih nevolja stavili smo vam se na raspolaganje, obećali smo načelniku da ćemo sarađivati, a građani sarađuju i od ranije, obišao sam svaku kuću i dao vaše i svoj broj telefona da mogu javiti, a vi sada nama govorite da lokalna zajednica ne sarađuje. Mi izuzetno dobro sarađujemo sa našom policijskom upravom i sve što je za njih interesantno ja javljam. Ono što je bitno napomenuti je da vaši službenici, umjesto da se nalaze u zasjedi, oni se često nalaze na ulici i zaustavljaju sve što nailazi i time su otkrili svoje položaje. I ovim se treba pozabaviti. U Bioči nije saobraćaj toliko frekventan da oni kontrolišu ispravnost vozila. Što se tiče krađe kablova, pošto ste vi okvalifikovali lokalnu zajednicu, a u tom slučaju ste zloupotrijebili našu sugrađanku iz Luke Šahzu Mušanović koja je dala izjavu da je cijelo selo lopov, da organizovano krađu, ja sada izražavam sumnju da vi sukcesivno mijenjate kabal, da nema krađe. Znači ako vi kažete da smo mi lopovi građani, ja vama kažem da vi mijenjate kabal na način da tražite izgovor u građanima i u krađi, a sve opet mi građani ispaštamo. Ilijaš nije imao proteklu godinu struju u kontinuitetu, a vi tražite izgovor u lokalnoj zajednici. Vi ste poslodavac, vi ste onaj ko distribuira struju i uredno naplaćuje račune od građana. Dakle, obezbijedite nam kontinuitet u snabdijevanju električnom energijom, a ove kvalifikacije koje ste rekli, ja bih želio da vi gospodine tehnički direktore poreknete za ovom govornicom.

Halid Dizdarević – Moram reći da nam gosti nisu ništa rekli već ono što mi nismo znali. Alarmatno je da nam niste ponudili niti jedno tehničko rješenje da nađemo alternativu kako da općinu Ilijaš snabdijevamo elektroenergetski. Ne trebamo se baviti pitanjima ko krađe struju, da mi tražimo počinioca. Dajte nam samo tehnička rješenja.

Nedim Matoruga – Do juče sam se smatrao sigurnim, ali već danas, načelniče policijske uprave ne osjećam se sigurno. Ako meni načelnik 5. PU kaže da oni nemaju rješenja i nemaju rezultata, šta mi kao građani treba da očekujemo. Ovo ne samo da je poruka građanima da nisu sigurni, nego i poziv svim onim potencijalnim kriminalcima da mogu gore izaći i krasti. Volio bih da čujem i odgovore na postavljena pitanja vijećnika.

Nijaz Rastoder – Neko je dobro rekao da ovo nije samo problem Elektrodistibucije i Policijske uprave, nego problem društva u cjelini. Sada je to na dugom štapu da se taj problem riješi, jer ako imate da omladina od dvadeset i nešto godina danju spava, a nešto jadnici moraju raditi da bi preživjeli. Zato jeste krivo društvo i tu je gorući problem. Slažem se sa direktorom Elektrodistibucije da nam ne treba više vojske da se čuvamo. Ako to bude bilo da se svaki objekat mora čuvati, onda ja ne znam gdje mi živimo. Na fonu sam onoga što je kolega Halid rekao. Znači ponudite nam neko tehničko rješenje.

Idriz Efendić-načelnik 5. PU – Koliko se sjećam rekao sam da, svjesni značaja i posljedica težine djela, poduzimali smo pojačano fizičko prisustvo, sarađivali sa mjesnom zajednicom, sarađivali sa drugim policijskim upravama, obavljali informativne razgovore sa osumnjičenim licima, poligrafski ispitivali, vršili pretrese ovih sekundarnih sirovina otpada i nismo našli rješenje i nismo imali rezultat, ali pozivamo, u međuvremenu sam rekao da pozivamo i privredne subjekte i građane, koje doživljavamo kao značajan subjekt sigurnosti, koji su nam pomagali u rasvjetljavanju ostalih krivičnih dijela, tražimo da se

udružimo i zajedničkim snagama postignemo cilj, odnosno hvatanja izvršilaca ovih kaznenih djela. Rješenja će vjerovatno biti i od same policije, međutim, ja se bojim da će biti kasno. U međuvremenu raste i nezadovoljstvo i nepovjerenje građana. Nemojte zaboraviti da mi na tom području čuvamo sedam kilometara prostora. Instrukcija iz jedinice kojom ja rukovodim jeste da se ide u zasjedu. Zasjeda podrazumijeva: osmatranje, iščekivanje, javljanje, i tako dalje. Kako se ljudi gore ponašaju, ja to ne znam. Vi, eto, kažete da su oni stalno na cesti, a to se može i ispitati. Neko je spomenuo pješačke staze. Ja sam rođen u selu i odlično znam šta je šuma. Iz Bioče lijevo, tamo prema Ahatovićima, ako znam dobro da se orjentišem, na pravaca ću proći pješke. Momak koji ukrade dalekovod može da nosi pedeset kilograma bez obzira koliki je uspon gore. Ja sam mislio na te pješačke staze, a ne na neke druge puteve, odnosno puteve prohodno za motorna vozila. Ponavljam, na stotinama je mogućnosti i kombinacija da se pređe pješice onim šumskim putem. Na kraju sam rekao, maloprije, nema povlačenja u ovom svemu. Dakle, nema povlačenja policije i odstupanja pred lopovima, da tako kažem. Da bismo bili operativniji, organizovaniji i funkcionalniji, potrebna nam je pomoć, pod broj jedan, privrednih subjekata, pod broj dva građana. Nemoguće je da u selu neko ne zna, za godinu - dvije, da neko nešto nije vidio, da nije čuo. Zadnja krađa kad je bila mi smo našli tamo prostor u šiblju, rastinu da je neko sjekao s motornom pilom. Neko je očito pripremao teren, stvarao sebi uslove da može ući i ne mogu vjerovati da niko ništa nije primjetio. Ja iskreno očekujem konkretniju i odlučniju pomoć onih koji tamo žive, egzistiraju, koji su ugroženi ovim problemom Handžić, eto, sjetio sam se prezimena, pomaže od prvog dana.

Alaudin Alihodžić-tehnički direktor Elektrodistribucije Sarajevo - Ne znam koliko ste pratili ono izlaganje koje sam dao u par kratkih crtica. Ja sam vam rekao da je Elektroprivreda, odnosno Elektrodistribucija podnijela mjere koje su u njenoj ingerenciji i trenutnoj moći. Što se tiče tehničkih resursa i tehničkih rješenja izdati su nalazi da se pokuša napraviti neki novi način snadbijevanja alternativnim pravcima Ilijaša. Rekao sam kako se kreće u rekonstrukciju dalekovoda kako bi se time počinocima pokušali napraviti manje atraktivnim ovaj pravac koji konstantno napadaju. Međutim, ja ne mogu garantovati da će to postići željene rezultate, jer ima primjera u Federaciji, ali u RS gdje se dešavaju ove stvari da to ne upali. Kako ste i čuli u mom prethodnom izlaganju, naveo sam da se sinoć desila krađa i da je poslovna zona Rajlovca kompletna ostala bez napajanja električnom energijom, a i dobar dio onih prigradskih naselja. Sinoć nije Ilijaš ostao bez struje, jer se trudimo da obezbijedimo neke alternative. Te alternative su vrlo često i neka hibridna rješenja, koja ne zadovoljavaju osnovne tehničke uslove, te zbog toga, i krećemo u ovaj veliki projekat koji sam vam najavio. Uložiti će se velike pare, ali mi je žao što će se uložiti pare zbog par likova koji se, da kažem, bave krađama, umjesto da se bavimo izgradnjom i rekonstrukcijom, pogotovo onih naselja koja još nemaju električnu energiju nikako. Ostali su ti projekti koji strašno puno koštaju, pogotovo ovi udaljeni predjeli od centra Ilijaša. U proteklih deset godina uzeli smo niz velikih kredita, koje trebamo vratiti, ustvari već ih vraćamo. Dakle nismo mi kao firma nismo te dalekovode ni rušili ni odnosili. U tom kontekstu hoću da vam dam i ovu informaciju, s nadom da neće remetiti istragu, prva sumnja je, zajedno samnom, bila na djelatnicima Elektroprivrede, konkretno Elektrodistribucije, kao obučene ljude, koji znaju kako vladati s tim materijalom. Kompletna moja firma je pretresena u dobrom dijelu, a vrata su otvorena i za dalje pretrese i istrage. Dakle, dobar dio relevantne dokumentacije je izuzet, pregledan, izvršene su analize, provjere. Svi naši radovi koji se obavljaju na terenu su višestruko evidentirani u pisanoj i digitalnoj formi. Sve naše govorne poruke, bilo da se radi o onima putem radio stanica ili telefona su trajno evidentirani. Svaki korak naših ljudi na terenu je pomno praćen. Što se tiče ove riječi terorizam, odmah sam se izjasnio to je moj lični stav, a ne stav tehničkog

lica firme koju predstavlja, dakle, ponavljam, to je moj lični stav. Pazite, ja ne mogu da se pomirim s činjenicom da je karakter krađe "neko je nešto ukrao", a 15, 20 hiljada ljudi ispašta, i to u više navrata, ne jednom, ne slučajno. Ovo je kontinuirani rad, dakle ciljani rad koji se radi u kontinuitetu. Bilo je perioda, upratili smo, kad se ovo dešavalo svaki drugi vikend. Znači, ovo neko ciljano radi, a taj koji to radi ima i svog naručioca, dakle ima svog poslodavca. Oni to uzimaju i negdje, nekome nose. S tim materijalom kod kuće ne mogu ništa, apsolutno ništa. To ukazuje, dakle, na činjenicu da ti isti ljudi imaju svoje poslodavce, naručioce, firme koje su ih angažovale to da rade. I ja se stvarno izvinjavam ukoliko sam unio nemir riječju terorizam, jer nisam znao koju drugu riječ da upotrijebim. Ovo nema veze s krađom, po meni. Neko znači maltretira građane Ilijaša i Rajlovca, privredne subjekte. Ne znam uopšte imate li podataka kolike su štete nanesene privrednim subjektima u proteklom periodu prilikom ovih događaja. Ljudi nešto ulože, trude se, rade, a neko dođe i to im u sekundi uništi. To je stvarno frustrirajuće, užas. Istražni organi, moram priznati, rade svoj posao korektno i odgovorno, međutim, ima tu i drugih organa, koji procesuiraju. Pred Novu godinu sam ja lično ulovio dvojicu na području Mostara. Privedeni su i nađeni su materijalni dokazi kod njih. Ti su ljudi nakon sata iz sudske obrade pušteni. Uz novčanu kaznu od tri stotine maraka. Drago mi je da ovo vijeće zasjeda i nadam se da će ovo vijeće imati snagu da donese neke naloge, neke zamolbe, akte, zahtjeve, prema nekom drugom organu, a to je tužilaštvo. Dakle, svi oni koji se procesuiraju i privedu da se obrade u duhu zakona kako bi trebalo, a ne da odgovaraju kao za pet kila pokradene žice. Tužilaštvo uopšte ne interesuje što je 15. 000 ljudi bez struje, što su privrednici izgubili desetine ili stotine hiljada maraka. To njih očigledno ne interesuje. Zato se nadam da će vijeće postići neke zahtjeve u ovom kontekstu. Ne znam da li postoje neki općinski inspekcijски organi, ali znam da postoje kantonalni koji me svakodnevno pregleda i pretresa. Ja se ne ljutim. Ljudi rade svoj posao. Ali mislim da bi isti ti inspekcijски organi trebali da kontrolišu i druge adrese, kao što su registrovana i neregistrovana otpadna odlagališta. Moje dijete je, prije dvije godine, doživjelo tešku nesreću. Propalo je kroz slivnik, šaht, čiji je poklopac ukraden. To nikoga ne interesuje. To je komad željeza, male vrijednosti, to se tako tretira, a to što je ona slomila nogu, polomila se, to nikoga ne interesuje. Ja se nadam koraku da vijeće sada uputi određene zahtjeve ka višim instancama, federalnim, kantonalnim i slično, koje bi mogle doprinijeti rješavanju ovog problema. Ni meni, vjerujte, nije jednostavno. Pošto sam ja tehnički direktor, rekao sam da hoću da znam svaki put kada se ovakav incident desi. Jutros su me probudili u četiri sata. Gdje god da se nalazim, oni me nazovu. I neka, ne smeta mi, oni rade svoj posao. Eto, nadam se da sam uspio da vam odgovorim na postavljena pitanja. Ako nekome treba još neko obrazloženje, tu sam, zaista.

Mahir Dević - Želim da nam odgovorite na pitanje zašto mi jutros imamo struje, a u proteklih 20 puta nismo imali, koji su to koraci koji su poduzeti? Da li možemo dobiti neku garanciju da to više neće biti tako?

Alaudin Alihodžić – tehnički direktor Elektrodistribucije Sarajevo - Poduzeli smo neke korake, da obezbjedimo neke alternativne pravce. Kad imate elektroenergetski sistem, protok struje i uklopna stanja definiše opterećenost sistema i šta možete propustiti kroz njega. Poduzeli smo neke korake širokih razmjera, da uradimo rasterećenja i obezbjedimo alternativne pravce. To su ti koraci. Uradili smo neke prekide u mreži. Možda tu postoje neki gubici, ali smo i na to pristali. Ja vam samo mogu dati garanciju da ćemo sve učiniti, ima ovdje ljudi koji me znaju, znaju da sam spreman sve učiniti, kao i tim koji stoji iza mene. Svojim očima sam gledao kako ljudi skaču vezani konopcem u nabujalu Bosnu, da bi podigli žicu. Ima i primjera gdje se i pogibije dešavaju. Zadnji put, momak se popeo da

krade žicu sa trafostanice i poginuo je. Prvi optuženi sam bio ja, jer sam ja odgovoran za njihovu sigurnost što je apsurd. Da nisam imao sve potrebne papire koji se traže od nas ja bih bio prvi optuženi. Godinama "gasimo požar", a nikako da se bavimo suštinom i da otklanjamo uzrok.

Adem Efendić – Predstavnik Elektro distribucije me je doveo u vrlo stresnu situaciju. Sve ovo što ste nama iznosili, a dobit ćete i naše zaključke, vi to sa svojim direktorom riješite. Nemojte se stavljati u ulogu policajaca. Sve mi znamo ovo što ste rekli, a imamo i neke informacije i radim sa vašim uposlenicima, da ste vi iz Elektro distribucije odgovorni za ovo stanje, jer vršite zamjenu bakarnog kabla aluminijskim. Još uvijek to istražujemo, pa ćemo vidjeti šta će biti. Ovdje kritikujete policiju, a oni rade koliko je to u njihovoj nadležnosti. Nama treba redovno i uredno snabdijevanje električnom energijom, a takođe nam treba proširenje kapaciteta izgradnjom nove trafostanice. U zadnjih pet godina kada je bajram nestaje električne energije. Sada ću vas pitati da li vaš dispečer, koji sjedi u centru za isporuku energije, da li on zna na kojem lokalitetu je krađa električne energije i da li se može intervenisati tako brzo, brže nego što lopov uspije odraditi posao. Vaš predstavnik sigurno treba da zna, a i zna kad mu je i gdje nestanak, prekid električne energije. Vaša je stvar da nam obezbjedite, ne alternativne pravce, već novu trafostanicu, nove stubove i kablove i mislim da će tad problem biti riješen. Hvala.

Selver Herić – Drago mi je da smo našli lopova, a to je "zaštitarska agencija i lokalno stanovništvo". Zahvaljujem se gostima, zahvaljujem se načelniku Pete policijske uprave na korektnom izlaganju, zahvaljujem se predstavniku Elektroprivrede Alaudinu Alihodžiću, zahvaljujem se predstavniku krim službe iz Novog grada, a zamjerim predstavniku MUP-a koji je došao nepripremljen na ovaj sastanak. Prvo niste trebali dolaziti, a da ne usaglasite mišljenja i stavove. Govorite doćićemo do prvih nekih rezultata nakon tri godine, a čovjek iza vas izlazi i govori da su otkrili dva ili tri slučaja, a i odmah ste svalili krivicu na tu zaštitarsku agenciju kao da su oni obavezni da to rade, a niste vi. Zahvalio bih se Safetu na terminu kompromisa, nismo ovdje došli da napadamo jedni druge, da ne djelujemo politički, da nađemo rješenje da stanovništvo ima struju, za koju obavezno izdvaja novac i moramo znati da je struja potrebna i za živote građana, koji su možda u tom momentu priključeni na aparate, i termin koji je predstavnik Elektro distribucije iznio, terorizam, je mali ako čovjeku koji je u momentu na dijalizi, isključi se struja, je itekako termin pogodan za ovaj vid. Ja bih zamolio sve nas, a prvenstveno predstavnike Elektro distribucije da dođemo do nekih zaključaka, da vidimo šta je rješenje, da vidimo kako da građani ne osjete tu krađu. To je suština. Još jednom se zahvaljujem.

Nedim Matoruga – Predložiću pauzu da usaglasimo neka mišljenja sa načelnikom općine Ilijaš, po potrebi sa predstavnicima institucija koji su ovdje prisutni kao gosti. Vjerovaću predstavniku Elektro distribucije da ovdje nije bilo nekih namjernih isključivanja struje, i da u tim logovima nema svjesnih naloga da Ilijaš ostane bez struje, da je to tehnički bilo opravdano. Većina nas ovdje ne zna da se sinoć ponovo desila krađa, nadam se da će tako biti ubuduće ukoliko bude nekih neželjenih efekata. Predlažem pauzu od nekih 10 minuta da usaglasimo zaključke koje ćemo usvojiti i uputiti ovim institucijama.

Nakon pauze Mahir Dević – Kazao je da su prijedlozi zaključaka na pauzi usaglašeni, te ih pročitao.

Općinsko vijeće jednoglasno usvojilo slijedeće

## ZAKLJUČKE

1. Općinsko vijeće Ilijaš traži od Elektroprenosa BiH a.d. Banja Luka da uvrsti u vrh prioriteta izgradnju TS 110/10 KV na lokalitetu Željezare Ilijaš.
2. Općinsko vijeće Ilijaš od JP Elektroprivreda BiH – Podružnice Elektrodistribucije Sarajevo zahtjeva da se obezbjedi kontinuirano napajanje električnom energijom cjelokupno područje općine Ilijaš uz adekvatno proširenje elektroenergetskih postrojenja.
3. Općinsko vijeće Ilijaš traži da se u problem krađe kablova na dalekovodu Blažuj-Ilijaš aktivno uključe, pored MUP-a Kantona Sarajevo, i Federalna uprava policije i SIPA.
4. Općinsko vijeće Ilijaš traži od nadležne kantonalne i federalne inspekcije pojačanu kontrolu rada firmi koje se bave otkupom sekundarnog otpada i sirovina na području cijele Federacije Bosne i Hercegovine.

Takođe je uvažen prijedlog vijećnika Adema Efendića da se izjave za medije daju u skladu sa članom 177. Poslovnika Općinskog vijeća Ilijaš.

Zatim je zamjenik predsjedavajućeg Mahir Dević zaključio tematsku sjednicu OV-a.

Zapisničar:  
Maida Habibović

PREDSJEDAVAJUĆI  
OPĆINSKOG VIJEĆA ILIJAŠ  
Damir Filipović, s.r.

\*\*\*\*\*

Ul. 126. ilijaške brigade br. 6, 71380 Ilijaš  
Tel. ++387 33 580-620, 580-698, fax. 400-505,  
Transakcijski račun kod VAKUFSKE BANKE,d.d. Sarajevo:1602000000710645  
e-mail [ov\\_ilijas@bih.net.ba](mailto:ov_ilijas@bih.net.ba)

